



Nunat Avannarliit Killiit Siunnersuisoqatigiiffiata Savalimmiuni naalakkersuisut, Kalaallit Nunaanni Naalakkersuisut Islandimilu naalakkersuisut kaammattorpaat suliniutit umiarsuit atorlugit angallannermi svovlimik aniatitsinermik annikillisisinnaasut eqqarsaatigalugit suleqatigeeqqullugit. Nunat kaammattorneqarput ikummatissat mingutsitsinnginnerusut, taamatullu aamma atortut avataasiarluni aalisarnermi imaatigullu assartuinnermi angallatit ingerlataasa pujuliornerinit svovlimik paaasinnaasut atorneqarnissaannik piumasaqarnikkut sunniuteqartumik avatangiisinullu mianersuussisumik nukissiuutinik atuinnermut periutsinik ineriartortitsineq atuutsitsilernerlu pillugit suleqatigeeqqullugit.

(Aallartitat siulittaasuat Lars-Emil Johansen)

Siullermeerneqarnera

Una siunnersuut Nunat Avannarliit Killiit Siunnersuisoqatigiiffianiit kaammattuut Partii Naleqqamiit ima oqaaseqarfigissavarput.

2000-ikkut aallartilaartut Inatsisartuni suliannut atatillugu ikummatissanik atuinnerup mingutsitsinera misissuiffigalugu Nunarsuarmi Silasiornerup Kattuffissua (World Meteorological Organisation – WMO) Schweizimiittoq attaveqarfigaara.

Misissuininni tassani paasivara taamani nunatta sineriaani qanoq umiarsuit sineriatta avataani angalaartut mingutsitsinerutiginersut nunap qaavani mingutsitsinermut sanilliullugit.

Eqqaamassuarput taamani erngup nukiliorfik ataasiinnaavoq, taamaattumik nukissiorfiit dieselitortut annertuupilussuarmik aniatitsigaluarlutik. Taamaakkaluartorli kilisaataatitta mingutsitsinerat annertuneruvoq.

Allatut oqaatigalugu, sineriatsinni umiarsuit mingutsitsingaatsiarput, minnerunngitsumik Umiarsuit takornariartaassuit kilisaataatitsinniit anginerungaartut tikittalernerisa kingornatigut.

Inuiaat kalaallit qangarsuaaniilli imaq inuussutigaat sulilu inuussutissarsiutitta pingaarnersaa imaaniit tunngaveqarluni, taamaattumik una kaammattuut inuiannut kalaallinut pingaaruteqartorujuuvoq eqqarsartaatsitsinnullu naapertuuttorujuulluni.

Taamaattumik Partii Naleqqamiit una siunnersuut Nunat Avannarliit Killerneersoq kaammattuineramik tunngaveqartoq paasilluarparput tunngavissaqarluarsoralugulu, massakut inuit ikummatissamik mingutsitsinerup kingunerisaanik nunarsuaq tamakkerlugu 60.000-it toqusalernikut killiffiani.

Taamatut naatsumik tunngavilersueriarluta Partii Naleqqamiit pingaaruteqarsoraarput erseqqissaatigissallugu qanittukut Naalakkersuisut umiarsuit takornariartaatit pillugit nunatsinnukartartut piunasaqataat killormut annikillisaaffigineqarnerat paatsoornartutut uungalu siunnersuumut naapertuutinnigilluinnartutut isigigatsigu, sulili tupinnarneruvoq Naalakkersuisut una kaammattuut ilalernartuutinnissaa Inatsisartunut innersuummassuk.

Siullermik takulinngilagut Naalakkersuisut qanoq ataqatigiinngitsigisumik ajuusaarnarlunnartumik sulinerat, ilalertariaqartutullu Inatsisartunut innersuussinerat tupiginngitsuugassaannigilaq.

Partii Naleqqamiilli suliatsinnut atatillugu ataqatigiisitsiniarsaraagut siunertatsinnullu aamma umiarsuarnut takornariartaassuarnut siunnersuummut akerliunitsinnut una naapertuummat nangaanata una paasillugu ilalernartillugu oqaatigissavarput.

Naggataatigut oqaatigerusupparput Inatsisartuni ilaasortap Anthon Frederiksenip § 37 aqqutigalugu apeqqutaa Umiarsuit takornariartaatit qanoq mingutsitsitiginerat pillugu apeqqutaa akineqarsimangimmat eqqumiigigatsigu, tassami WMO naatsorsueriaaseqarpoq ajornannigitsuaqqamik nassaarisinnaasaraluannik akinerminnut tunngavigisinnaasaannik.

Taamatut oqaaseqarluta siunnersuutip aappassaaneerseqannginnerani ataatsimiititaliami sukumiisumik nalilersorneqarnissaa innersuussutigissavarput.

Qujanaq.